

“CJÂR” PAPE, TU NUS COSTIS MASSE!

Il cantin al scugnive saltà fûr, parceche lis unichis regions che il pape nol à stât a son la nestre e il Trentin-Sud Tirol.

Ocasions and'ere: in Friûl il milenari di Udin; a Triest i 25 agns de consacrazion 'e Madone. Cumò, tant par cjatâ fûr un rinpìn, si pensares al licôf pal domo di Glemone, tal decim dal taramot. Ma la robe e jè frede e nè lajù nè culì nissun no si decît a fâ il prin pas. Tune cunvigne di chest mês, al è stât frontât il “câs” e lis resons di cheste mancjade visite a saressin chestis.

A Rome, ch'a son informâz su la situazion gleseastiche e politiche nostrane, e àn pore che il pape al vegni contestât tant di une bande e di cheâtre.

Al è clâr che la “Glesie furlane” no tasares su la improibizion di preâ par furlan, robe garantide dal dirit naturâl oltri che dal dirit dai popui. E chest un pape al à di capîlu, co al va berlant di spalancâ lis puartis. Ancje lis sôs! Lu tacaressin i slovens, pe stesse reson. E par resons juste contraris, i martars de talianitât, che tai cunfins and'è sinpri bondanse. E alore il pape, ch'al è galjot, al preferis navigâ in âtris ajars, cence lâ a urtiâsi a pote vie.

Te glesie “regionâl” nol è che la clime e seti miôr. Un vescul no j va chest mût di fâ ch'al sa di trionfalic e di baracon; un âtri al à pore di jessi ferît tai siei sintimenz di altissime talianitât e che i slovens a alcin masse la creste. Cualchidun, plui concret, al à fevelât ancje di trop ch'al costares chest fat “storic” e a son saltâz fûr ancje i numars. Stant ai esperz, si vignares a spindi, pal viaç, 3 miliarz (3000 milions!). In plui e jè usance di dâj, dongje dai garofui e dai pipins, une “buste” pes sôs oparis di ben. I plui pedoglôs a dan sui 300 milions; chî di nô, par no fâsi cjalâ, si vares di dâj 500 milions. La region, daûr che si sint, e sares ancje disponude a smolâsi pal viaç, ma al reste sinpri il mieç miliart des diocesis ospitanz. Cence meti in cont duc' i berdeis di pulissais, di garbenîrs, di contrôi cjase par cjase, di stradis blocadis e vie. Insome, cun tantis disgraciis ch'o vin vudis, no podin permetisi âtris consequensis. E difat la rispueste cuasit gjenerâl e jè stade che, salacôr, al è miei ch'al resti là ch'al è. S'al crôt, ch'al prei instes par nô, che no j cuintranbiarìn, magari in marilenghe, ancje se no vâl. O pierdarìn di une bande, ma o vuadagnarìn tal tacuìn, tai gnerfs e, siguramentri, ancje in fat di religjon. Cul timp a lâ, al vignarâ ben un pape plui a bon prêsit!

Lui 1985

pre Antoni Beline